



### KONSEY REZYONAL


# EN PREMIE PA DAN GOUVERNMAN LOKAL

**L**DS in nonm bann manm pour Konsey Rezyonal lo Mahe e bann zil pros ki pe al formen byento. Sa i en premie pa dan en sistenm gouvrenman lokal ki kapab anmenn konsern bann sitwayen pli byen devan ladministrasyon distrik

En striktir gouvrenman lokal i sipoze ganny etabli atraver eleksyon dan lavenir. Me akoz depans pour fer en eleksyon e lefe ki reform Komisyon Elektoral pa ti ankor konplete, LDS in dakor avek propozisyon ki sa sistenm Konsey Rezyonal i ganny etabli baze lo rezilta dan dernyen Eleksyon Lasanble.

Bann konsey pou ganny etabli dapre proporsyon vot ki bann parti politik ti gannyen dan eleksyon 2016.

Pou annan 7 Konsey Rezyonal an tou, 6 lo Mahe e enn pour bann zil pros. Sak Konsey Rezyonal i regroup 3 oubyen 4 distrik e pou annan 7 konseye lo sak konsey. En tyermenn pour sak konsey pou ganny elekte par bann manm. MNA pour sa distrik pou osi asiz lo sa konsey, osi byen ki



bann MNA ki reste dan sa rezyon e ki dan Lasanbe lo baz proporsyonel.

Bann konsey rezyonal pou annan manda pour fer en plan pour developman zot rezyon e pour sirvey travay Ladministrasyon Distrik ki tonm dan zot rezyon.

Sa sistenm i a permet tou le de kote politik pour annan en kontrol lo-travay ladministrasyon distrik. Dan lepase in annan bokou konplent ki

#### **BANN KONSEY POU REGROUP DISTRIK KONM SWIVAN:**

**NOR** :Anse Etoile, Glacis, Bel Ombre, Beau Vallon

**SANTRAL 1** : English River, Mont Buxton, St Louis, Bel Air

**SANTRAL 2**: Mont Fleuri, Plaisance, Les Mamelles, Roche Caiman

**EST**: Cascade, Pointe Larue, Anse Aux Pins

**SID**: Au Cap, Anse Royale, Takamaka

**WAS**: Port Glaud, Grand Anse Mahe, Anse Boileau, Baie Lazare

**ZIL PROS**: Grand Anse Praslin, Baie Ste Anne, La Digue e zil pros

Ladministrasyon Distrik i fer tro bokou travay pour Parti Lepep. Sa sistenm i a osi met zot lo en baz pli endepandan e pou travay pour tou dimoun.

LDS i ekspekte ki bann manm Konsey Rezyonal pou travay tre pre ek bann MNA , e avek Repezantan LDS dan distrik kot napa MNA LDS ki'n ganny elekte. Sa i a permet zot anmenn bann konsern zabitan devan e travay avek lotorite gouvrenman pour rezourd bann problemn.

## LASANBLE NASYONAL I LANS EN LOT LANKET KONSEKAN

**O**moman ki nou piblikasyon pe al anba lapres, nou pe swiv en lot deba remarkab dan Lasanble Nasyonal.

Lasanble, par mosyon Manm LDS Terence Mondon, in demann en lanket dan COSPROH, en lakonpani gouvrenman ki ti propriyeter en douzenn lotel dan bann lannen 1980-90.

Dapre revelasyon ki bann manm Lasanble in fer, sa i en lot ka sokan lo

bann transaksyon propriyete gouvrenman ki'n al pou benefisyen bann endividi.

Sa lanket pou bezwen regard de pre bann biznes ki Msye Mukesh Valabhji, ki ti tyermenn COSPROH, in fer. Deza lasanble in mansyonn plizyer size ki konsern li ki pou bezwen ganny ekzaminen.

Pour fer kler kote responsabilite i tonbe, mosyon Lasanble i demann

Prezidan Larepublik li-menm pou antreprann sa lanket avek Loditer Zeneral.

Tou le de kote latab dan Lasanble ti siport sa mosyon tre for, ki montre ki i en size ki pa pou ganny met dekote. I reste pour Msye Faure prezan pran responsabilite pour anmenn laklerte lo bann size kot serten endividi in donn bal dan larzan e propriyete ki ti pour tou Seselwa.

# MSYE FAURE / SENM ANKOR KONFIZYON LO ASSOMPTION

**M**syé Danny Faure in fer Seselwa dout son lentansyon e menm demande si i koz laverite. Sa i akoz in annan 2 diferan parol lo size korporasyon avek Lenn dan baz militer lo zil Assomption .

Avan i ti al son vizit dan Lenn, Msye Faure ti deklare ki Assomption pa pou fer par dan son diskisyon. Me laba, son bann deklarasyon ek lapres endyen in donn lenpresyon ki i pou siport demars Lenn pour ganny en par dan fasilite militer lo Assomption. Sa i an retour pour en pret 100 milyon dolar ki Lenn pou donn Sesel.

Ler in retourn isi, Msye Faure in



sanz parol ankor e dir ki sa larzan napa nanryen pou fer avek Assomption.

In dir ki sa pret i pour diferan proze sivil gouvènmàn. Me Sekreter Prensipal pour Finans in apre konfirman ki sa larzan i pou depans militer.

Rezilta se ki lepep Seselwa in dout lentansyon Msye Faure. In lev kestyon si in donn kek langazman avek Lend,

obyen eski nou pe pey depans ki Lend in deza fer pour sa baz.

An tou ka, lepep Seselwa i determinen ki pou napa baz militer etranze lo Assomption obyen lot zil e LDS pou veye ki sa pa arive. Msye Faure pa pou anbet nou. Assomption i reste pour Sesel e nou pou veye ki sa pa sanze.

## Kestyon lo program lalit kont drog

**K**onmela, tou le bomaten, ler ou pase dan bann distrik, ou kapab war en lalinny dimoun pe espere pou zot ganny zot metadonn. I annan rapor ki zot ganny osi en larzan pour al avek.

Sa i metod prensipal ki Dr. Patrick Herminie, ki ansarz program kont drog, in met an pratik.

In osi anons mezir tel ki donn sereng dan prizon, e petet donn drog osi a lavenir.

I difisil war tou sa la otreman ki en kapitilasyon. I paret ki nou pa pe war okenn solisyon eksepte siport sa bann dimoun dan zot adiksyon. Eski nou pe vreman ed zot obyen nou pe kondann zot?

Dapre rapor ki nou gannyen, sa metod napa okenn lefe lo redwir adiksyon.

Ziska ozordi napa en sif pou montre konbyen adikt ki pe arete servi drog akoz sa program.

Si nou pou donn metadonn, i bezwen anba kondisyon pli kontrole, kot nou konnen ki sa adik pe al fer apre e ki i pa pe al direktman rod son doz eroin.

Nou problemn drog i sitan serye ki nou bezwen en metod ki kapab marse. Nou pa war en sans dan sa ki Herminie pe fer eksepte fer dimoun depan lo li.

Antretan, nou pa war okenn zefor pour aret eroin antre dan pei.

## Eski LDS pe reform Parti Lepep ?

**A**nkòr enn fwa, Parti Lepep pou sanz son non.

I en size ki nou kapab fer fars lo la, be annou pran li serye. Si i pe sanz son non, savedir ki Parti Lepep i anvè kase avek lepepase.

Ozordi Parti Lepep i en parti ki fayit moralman. Zot napa en sans direksyon e zot napa prensip kler. Zot pa ni sir lekel ki zot dirizan.

Dan Lasanble Nasyonal. nou tann bann reprezantan Parti Lepep pe sant sanson ki zot pa ti zanmen sante avan. Konmsi zot in fek dekouver ki sa laverite ek lonekte. Zot pe kestyonn a ot vwa bann politik e bann pratik ki zot in defann dan lepepase. Plis ki kestyonen, zot pe kondannen osi.

Tou sa i vin zis par lekzanp LDS. Parti Lepep pa ti pou sanze si zot pa ti ganny montre ki zot bezwen sanze.

I ava remarkab si LDS i arive fer Parti Lepep en parti ki koz laverite e vreman pratik bonn gouvènmàn. La, nou a vreman kapab dir ki'n nou'n anmenn pratik lademokrasi e fer en gran diferans pour Sesel.

# Bal Kreol

## Au Cap LDS

July 27th, 2018 from 9.00 pm to 2.00 am

### Asian Fusion Restaurant

### Entrance R200, Bar Cash